


lis Gnovis

■ **GURIZE.** Tessêrs ecologjics e solidaris

Li dal «Enfap» di Gurize, al è daûr a partî un circol di studi che al smire di tirâ dongje une comunitât che si dedicarà a la valorizazion de tiessidure artesanâl mediant dal studi di prodots e di servizis gnûfs partint dal recupar di draps e di stofis dopradis. La iniziative, seont i principis dal aprediment autodirezût e no formâl ricognossût da la Europe e prudelât de Regjon (POR FSE 2014-2020-PPO 2018), e je inmaneade di «Enfap Fvg» (www.enfap.fvg.it), cu la partecipazion dal grop «Culture Tessili» e dal «Forum dai Bens comuns e da la Economie solidarie» (www.forumbenicomunifvg.org/tessile-ecosostenibile-ed-innovazione-sociale/). Il cors al durarà 40 oris, dividudis in 12 riunionis li dai uficis di strade dei Cappuccini 19, a Gurize (par informazions: Elena Slanica, 0481 533148 – segreteria.go@enfap.fvg.it).

■ **SALBETRAND.** Une vite pe Ocitanie

La rassegna «Chantar l'uvèrn» e onore cuntun apontament speciâl François Fontan, grant ispiradôr dal «Moviment autonomist ocitan» e autôr dai saçs «Ethnisme, vers un nationalisme humaniste» e «La nation occitane, ses frontières, ses régions». La figure dal inteletuâl e sarà presentade sabide ai 9 di Fevrâr, a 15, li dal «Parco del Gran Bosco», a Salbetrand, par cure di «Chambra d'Ôc» e dal editôr «Papiros», che al presenterà la gnove edizion di «Etnismo», dulà che e comparis une jentrade critiche di Sergio Salvi. Si proietarà po il film documentari «E lhi a lo solelh» di Diego Anghilante e di Fredo Valla su la vite e sul pinsîr di Fontan.

■ **SEDEAN.** Seradis «psychedelic pop»

Il «Teatro della Sete» e la clape «Lenghis dal Drâc» a àn batiât il lôr spetacul «Donald D. T. Live» une «serade

psychedelic pop furlane». La «tourné» de raprezentazion, prudelade di «ARLeF», dopo di jessi stade a Palaçûl e a San Vit dal Tiliment, vie pal mès di Fevrâr, e rive a Sedean e a Comeliâns. I spetacui a son programâts sabide ai 8, li dal teatri «Clabassi», e sabide ai 15 di Fevrâr, li de sale «L'Alpina». Ducj i doi i spetacui, ispirâts dal romanç di Stiefn Morat «Donald dal Tiliment», a començaran a 20.45.

■ **SAN ZORÇ DI NOIÂR.** Fieste leterarie

Sabide ai 9 di Fevrâr, e cole la premiazion dal concors leterari «Vôs de Basse». Di chê strade, i Comuns di Cjarlins, di Gonârs, di Muçane, di Porpêt, di Prissinins e di San Zorç a àn inmaneât une cerimonie a 18, li di vile «Dora», cul jutori de «Ostarie Letterarie Contecurte». Intant de serade, e sarà presentade une leture seniche de prime part da la comedie «Lis zariesis pe mari di San Pieri» di Alviero Negro, che al è un dai autôrs de Basse che il premi al tintint di onorâ, dutun cun pre' Giovanni Schiff, Tita Marzuttini, Gina Marpillero, Luciano Morandini e Pierluigi Visintin.

Joibe 7	S. Juliane	Lunis 11	La Madone di Lourdes
Vinars 8	S. Jaronim	Martars 12	S. Melezio V.
Sabide 9	S. Polonie di Rome	Miercus 13	S. Anselmo di N.
Domenie 10	S. Scolastiche	Il timp	Tante ploie.



Il soreli
Ai 6 al iieve aes 7.24
e al va a mont aes 17.19.



La lune
Ai 12 Prin cuart.

Il proverbi
Cui che al è stât scotât te meste al sofle te batu-de.

Lis voris dal mès
Se la temperadure e cres chel pôc,
si pueidin semenâ bledis, jerbis ravis, carotis.

Opportunitât o disastri?

*L'abandon dal teritori
al rint i boscs
ogni di plui crevadiçs*

Il tristimp che, la vilie dai Sants di an passât, al à rasât 41 mil etars di boscs in dutis lis regions dal Nord-est al pues diventâ une ocasion «par tamesâ la capacitât di reazion des aministrazions publichis, dai proprietaris boschifs, des impresis e de societât civil in face di une disgracie straordenarie ma che, magari cussì no, e tornarà indaûr a capitâ». Ma «sarino in stât di valutâ i dams, di netâ e di recuperâ i boscs fiscâts e di no strassâ chê quantitât spropositade di legnam che, in fal, o vin a disposizion?».

Par resonâ sun chestis grandis cuistions, il Dipartiment Teritori e Sistemis agri-forestâi de Universitât di Padue («Tesaf») e la Fondazione «Giovanni Angelini - Centro Studi sulla Montagna» a àn inmaneât une convigne, che e larà indevant par dute la zornade di vinars ai 8 di Fevrâr, a Belum.

L'apontament, intitulât «La tempesta Vaia: disastro o opportunità per le foreste del nord-est?», al començarà a 9.30 li de sale «Eliseo Dal Pont Bianchi» (viâl Fantuzzi 11).

Sot dai vôi al tornarà il belanç dal disastri capitât dai 27 ai 31 di Otubar dal 2018, cuant che il burlaç al à savoltât i boscs plui bie e plui produtifs dal Nord Italie. Abàs a son colâts 8,6 milions di metris cubics di legnam, che sù par jù a son 7 voltis di plui de quantitât che, intun an, a lavorin lis sieis talianis. I esperts a calcolin che in Italie, prin di cumò, no 'nd jere mai stât un danezament economic cussì grant dal patrimoni forestâl, cence calcolâ il dam ambientâl e turistic, in teritoris cuntune innomine mondiâl: Panevege/Paneveggo, Cansei, Val Vissende, Val de Fiem, Slege/Asiago...

Fra i protagoniscj dal dibatiment di



Un speli dal disastri causonât dal burlaç dai ultins dis dal mès di Otubar stât

**Ai 8 di Fevrâr,
grant confront
a Belum
sul destin
dai boscs alpins,
daspò
dal burlaç
di an passât**

Belum, al sarà il professôr Davide Pettenella che, in chescj dis, al à batût sui imprescj che in chei altris Pais si dopre za par frontâ i dams causonâts di aiarons, glaçaduris e atacs parassitaris, al ven a stâi gjeolocalizazion e cuantificazion subitanie; mobilizazion e coordinament des impresis boschivis (ancje dai Pais confinants); creazion di dipuesits pal stocagio in umit des taiis; interuzion imediade dai tais ordenaris dai boscs scapui e vie indevant. Ma

seont Pettenella al è za il moment di pensâ ancje par dopo finide la emergjence, cuant che si scugnarà programâ rimboscamenti artificiaî e studiâ cemût adatâ i sistemis di gjestion dal bosc in mût di incressi la capacitât di resistence e di adattamento ai atacs climatics. Parcè che al è clâr che la mancjance di planificazion, la riduzion dai esboscs e l'abandon dal teritori a rindin i boscs ogni di plui crevadiçs.

Mario Zili

Radio Onde furlane di 39 agns

Ai 2 di Fevrâr, «Radio Onde furlane» e à finît 39 agns: in chê di dal 1980 a tacavin lis sôs trasmissions dai studis di plaçâl Cella, a Udin, dulà che e à cjatât la sô prime abitance la cooperative «Informazione Friulana», editôr dal «mass media» furlanist (www.ondedefurlane.eu e www.facebook.com/radioondefurlane/). Il cjadalan al è stât fiestezât intant dal program «Dret&Ledrôs». Di chê strade, «Radio Onde furlane» e je partide cuntune programazion gnove. Dai 4 di Fevrâr, al è tacât il documentari radiofonic «Micro Radio / Rainbow Radio» sul sisteme di protezion par dispatriâts inmaneât a Cividât e a Tumieç de «Caritas» udinese.

Messe par furlan

Ancje a Udin, une volte par setemane, si cjante Messe par furlan. La liturgjie eucaristiche de domenie e ven celebrade te vilie de fieste, ogni sabide a 18, li de capele «de Purità» (cun Radio Spazio che le trasmet sul moment). Sabide ai 9 di Fevrâr, al cjarantà Messe pre Toni Cappellari. E compagnarà la celebrazion la corâl «Vôs di mont» di Tresesin.

Peraulis in dismentie par cure di Mario Martinis❖ **BUINÇ**

s.m. = arconcello
(dal latino *bicōngius "misura doppia")
Imprestaitmi il buinç che o voi a cjoli la aghe te fontane.
Prestatemi l'arconcello che vado a prendere l'acqua alla fontana.

❖ **BUINEGRAZIE**

s.f. = affabilità
(composto dalle parole buine- e -grazie)
Bepi al à la buinegrazie juste par frontâ la cuistion.
Giuseppe ha l'affabilità giusta per affrontare a questione.

❖ **BULIGÂ**

v. = brulicare; buciare, bucarsi
(dal latino *bullicare, da bullire "bollire", ma nel friulano è penetrato attraverso il veneto)
Il most al bulighe ancje te tace.
Il mosto bucia anche nel bicchiere.

❖ **BULO**

s.m. = spavaldo, prepotente, ardito
(entrato attraverso il veneto, probabilmente deriva dal medio alto tedesco bûle "amico intimo, amante")
Il moròs di Filipe al è un bulo di chei!
Il moroso di Filippa è davvero uno spavaldo!

❖ **BULTRIC**

s.m. = stomaco (in senso dispregiativo)
(dal latino ventriculus "pancia, ventre")
Ce bultric che al à Barnabe, âstu viodût trop che al mangje?
Che stomaco ha Barnaba, hai visto quanto mangia?

❖ **BURACJE**

s.f. = borraccia
(adattamento dall'italiano boraccia, la cui origine è sconosciuta, anche se si ritiene sia un relitto mediterraneo)
Par lâ in montagne o vin di puartâ une buracje.
Per andare in montagna dobbiamo portare una borraccia.